



Investigacion ta duna bista ariba motibo pa cambio di estudio den prome aña

DEN HAAG – Director di departamento di enseñansa di Gabinete di Minister Plenipotenciario, drs. Samuel Dumfries recientemente a presenta su rapport na Minister Plenipotenciario Sr. Alfonso Boekhoudt na unda el a duna informacion di su investigacion di e porcentahe halto tocante e fenomeno di cambio di estudio (Studie Switch). E porcentahe aki ta fluctua pa aña entre 26% pa 38%. E fenomeno aki ta algo cu ta ripiti su mes tur aña, caminda nos studiantenan ta cambia di estudio den e promer aña caba di nan estudio na Hulanda. Sr. Dumfries a haci e investigacion aki over di e periodo di 2006 te cu 2013 pa determina cua por ta e motibonan di e fenomeno indesea aki.

Den su presentacion na Ministro Plenipotenciario Sr. Dumfries ta indica cu e conclusion mas yamativo ta e echo cu hopi di nos studiantenan no ta wordo suficiente prepara pa scoge un studio adecua. Pesey tin asina hopi cambio di estudio durante e prome aña caba di nan estudio na Hulanda. Hopi a indica cu nan ta scoge pa un estudio pasobra nan wordo influencia pa nan amigonan, tata of mama. Pero echo ta tambe cu nan ta scoge pa un estudio sin sa exactamente kico e ta encera.

Den su rapport Sr. Dumfries tambe ta cuantifica e dato di studiantenan cu ta studia mas cu 4 aña (hopi biaha te hasta 7 aña) pa un estudio cu duracion normal di 4 aña. E informacion ta mostra e porcentahe di studiantenan cu ta stop di studia (sin

caba e estudio), e porcentahe di esnan cu ta termina e estudio cu exito, y tambe esnan cu ta caba nan estudio pero no ta bay bek Aruba. Dumfries tambe ta compara su cifranan cu esan di diferente rapport Hulandes.

E porcentahe di esnan cu no ta bolbe bek pa bai traha na Aruba ta fluctua pa aña entre 25% pa 33%. Un di e rason nan mas grandi ta cu studiantenan kier mira posibilidad pa crece den nan carera profesional prome cu regresa, pero e factor di e posibilidad pa haya trabao adecuado, na nivel y den e ramo di locual nan a studia ta hunga un rol importante. E Euro cu su taza di cambio halto tambe ta hunga un rol ya cu durante nan estudio nan ta acumula tambe un debe den e moneda aki.

Dumfries ta duna sugerencia den su rapport con pa para e braindrain y tambe crea incentivo.

Den su investigacion e ta splica cu tin otro aspectonan cu tambe tin influencia ariba e cambio di estudio. Entre otro tin e aspecto na unda nos studiantenan no ta domina e Hulandes na e nivel cu ta wordo uza den e scolnan na inicio di nan estudio avansa. Otro aspectonan negativo cu ta hunga un ta heimwee, depression, culture shock, soledad y factornan psicologico.

Sr. Dumfries ta spera cu e por presenta su rapport tocante di e cambio di estudio pronto na Minister di Enseñansa, director Directie Onderwijs, na e scolnan HAVO/ VWO y EPI y na parlamento di Aruba.